

Pueblo kier wak contenido di KB riba cabez di Ministro

ORANJESTAD(AAN) Henter e asunto di huramentacion di señor Glenbert Croes a bay rebenta den scochi di contrincantenan politico pasobra pueblo a bin realiza cu ta un wegá hopi sushi ta worde hunga door di contrincantenan politico di Glenbert y di

partí di poderman colonial.

Tin investigacionnan andando contra Glenbert Croes y ta pesey e no por worde huramenta!

Esaki no ta ridiculo?! Paso-bra ta for di tempo cu Glenbert Croes a cuminsa cu su proyectonan, hopi tabata esnan cu tabata contra dje y ta

tur tabata pidi sea directo o tras di cortina, pa e ministro aki ser investiga y te awe e ministro aki no a ser baha di su puesto.

Proyectonan cu ministro Glenbert Croes a cuminsa, ta proyectonan grandi y si e tabata asina corrupto anto ta dicen te awe e proyectonan por a sigui nan caminda sin cu medidanan fuerte a ser tuma contra e ministro, pa para e supuesto corrupcionnan cu e tabata meti aden?

Despues cu Hulanda y Aruba a gasta miyones pa investiga e ministro di transporta y comunicacion te awe nan a keda draai rond pa asina na e momento politico adecua, nan bin cu medida

den sentido di supuesto investigacion penal cu no ta permiti e ministro aki huramenta.

Ora cu ta papia di un, mester papia di tur y ta pesey pueblo kier wak contenido di KB cu tin riba cabez di Watty Vos pasobra tur esnan cu a vota pa Watty kier sa si tabata tin actonan penal o cualier acto cu tabata hustifica e KB riba cabez di nan candidato y cual KB a ser hinca den otro door di Hulanda cu bendicion di Henny Eman.

E decision pa pone e KB ta conoci pa pueblo pasobra esaki e ser publica den casi tur medio di comunicacion na Aruba, pero e motibo y e contenido real te awe pueblo no a

haya di wak y awor a bira tempo cu pueblo mester haya claridad riba e asunto aki.

Ta pakico señor Watty Vos no por a keda cu Seguridad Nacional bao di su encargo?

Kico tabata tin tras di cortina cu Hulanda hunto cu Henny mester a bay asina leu pa tuma medidanan drastico pa kita e autoridad di ministro Vos?

E asunto di Beta Hotel y Spartaco Ghini tambe mester worde muestra na pueblo y Ministerio Publico hunto cu Hulanda mester bisa pueblo ta di con Henny si por a tuma placa di un criminal y e por a keda den politica y cu te hasta awor e por huramenta atrobe y otronan no por.

Relaciona cu caso De Mey Otro siman Beto Arends mester bay Curaçao

ORANJESTAD(AAN) -- Beto Arends, un di e personanan cu Merca a haci peticion pa extradicion, lo mester viaha pa Curaçao pa duna declaracion como testigo den e caso penal contra de Mey.

Informacion cu DIARIO ta dispone di dje ta muestra cu otro siman 12 di Juni, Arends lo mester duna declaracion dilanti Corte Superior.

Pa lora ta trata extradicion, te ainda no ta conoci kico gobernador di Curaçao lo haci. Por ta cu unavez cu Arends tin cu bay duna declaracion na Corte Superior na Curaçao, e lo tende encunto su extradicion. Manera ta conoci, aña pasa na Juni 1997 Beto Arends a worde deteni na Curaçao ora el a viaha acom-

pañá cu su abogado relaciona cu e caso de Mey. A resulta cu Merca a manda un peticion di detencion contra Arends na Curaçao pendiente e documentacion pa su extradicion. Abogado mr. Helen Lejuez a viaha pa Curaçao y despues di hopi debate den Corte finalmente el a logra cu aña pasa December, Arends a haya su libertad condicional y cu e por a regresa Aruba.

Na Aruba e caso di extradicion a tuma lugar y e resultado ta conoci. Corte Superior a conseha gobernador di Curaçao pa extradita Beto Arends. Desde cu e conseho aki a bay Curaçao no a tende nada mas. Tampoco no a tende nada mas di David Cybul kende tambe ta worde busca pa autoridadnan Mericano.

Opinion: Entreguista mayor ta bira Hofleverancier

Señores nan ta bin atrobe, mandatarionan Hulandes ta na caminda pa Aruba y mirando cu gobierno di Aruba ta demisionario, e pregunta mester bolbe worde haci; kico nan ta bin haci y ta kico tin pa entrega atrobe?

Ta kico a resta pa entrega na Hulanda cu ministro Sorgdrager ta bin di bishita na Aruba?

E ministro di husticia aki ta bin controla pa wak si na Aruba ministronan cu ta bula e baile di pipa Hulandes ta cumpli cu loke Den Haag a pone riba nan cabez?

Screening di ministronan ta un problema grandi na Aruba y awor ta cua ministro ta ministeriale pa ricibi Sorgdrager pasobra ta hende drechi so por ricibi hende drechi y ta ken ta cumpli cu e reglanan berdadero di hende drechi pa

por bay papia cu Sorgdrager?

Winnie Sorgdrager lo bay puntra Jan; "Con ta cu Gembí, boso a weg e caba?"

"Con ta para cu Poosteema? Tin conflicto di boton cu payet o ta stempelnan tin den caminda?"

"By The Way, con nos lo bay haci cu e dolor politico di IK, pa evita conflicto medico di interes, Jan?"

"Luister Jan, nos a keda cla na Hulanda cu bo nombracion como "Hofleverancier"; Entreguista Mayor cu titulo oficial, Jan no confundí e titulo aki cu otro leverancier nan pasobra loke bo ta haya no tin nada di haber cu HOF, ta djis un titulo e ta, no cuminsa cana banda di bo Klompan!!."

"Kico mas tin pa entrega Jan? Contami Jan pasobra mi no por bay cas cu man bashi, er moet toch wat over zijn gebleven; pensa Jan, pensa!!"

SVB ta fortalece cooperacion internacional



ORANJESTAD (AAN): SVB ta auspiciar un conferencia internacional di CAOSA (Comision Americano pa Organizacion y Sistemanan Administrativo) di 9 pa 11 di Juni proximo. Esaki lo ta e di IV Conferencia Tecnico di CAOSA cu ta un di e cinco curpanan di apoyo tecnico di e Conferencia Interamericana pa Seguridad Social (CISS).

E organizacion madre aki ta pa promove e cooperacion entre e institucionan di seguro social den nos hemisferio occidental. CISS tin su oficianan principal estableci na Ciudad de Mexico.

E tres conferencianan anterior di CAOSA a tuma lugar

na Miami, Florida, Santiago de Chile, y Washington D.C.

E meta di e conferencianan tecnico aki ta pa trece cooperacion entre e institucionan pa seguridad social di e paisnan Andino, America Central, Norte America, Caribe y Cono Sur. Topiconan y problemanan cu ta ser discuti ta di interes comun pa tur e paisnan miembro y ta relaciona cu seguridad social.

Durante e conferencia di e aña aki e temanan di interes lo ta: con detecta y preveni fraude; financiamiento y cobranza; manejo di cambionan tecnico; problemanan di recurso humano; e impacto di e problematica di aña 2000

den automatizacion; y mercadeo di seguridad social.

Participantenan den e conferencia di e aña aki na Aruba Marriott Resort-Stellaris Casino, lo inclui ehecutivonan den seguridad social di Aruba, Bahamas, Barbados, Belize, Islanan Virgen Britanico, Chile, Colombia, Curacao, Grenada, Guyana, Jamaica, Mexico, Panama, St.Kitts, St.Nevis, St.Vincent, Uruguay, y USA (Merca).

Dr.Lili Beke-Martinez, Minister di Salubridad Publico, Asuntunan Social, Deporte y Cultura lo participa den e ceremonia di apertura di e conferencia importante aki.